

Listovi gračaničkog kalendara od 8. 10. 2008. do 4. 5. 2009.

8. 10. 2008.

Potpaljen prvi kotao na toplani, postrojenja puštena u probni rad: „Draži mi je ovaj današnji čin nego drugi načelnički mandat...” (Nusret Helić)

Toplifikacija Gračanice, najavljena kao projekat 21. stoljeća, bez obzira na sve poteškoće (objektivne i subjektivne prirode), postaje stvarnost. Svi oni koji su vjerovali i „gurali“ ovaj projekat, najbolju satisfakciju dobili su u trenutku kada je izvršeno probno potpaljivanje prvog kotla i izvršena takozvana „topla proba“. Kotao su simbolički potpalili općinski načelnik Nusret Helić, predstavnik firme SEGES Enes Hamidović i glavni koordinator projekta Omer Hamzić. Nakon toga održana je kratka press konferencija na kojoj je općinski načelnik Nusret Helić, između ostalog, izjavio i ovo:

„Vjerujte, draži mi je ovaj današnji čin nego drugi načelnički mandat koji sam osvojio prije tri dana. San, u koji mno-

gi nisu vjerovali, postao je stvarnost i kada projekat za dvije godine bude završen Gračanica će, osim grijanja riješiti i najveći ekološki problem u vrijeme grejne sezone, kada udišemo najzagađeniji zrak, ne samo na Tuzlanskom kantonu, nego i šire.“

24. 11. 2008.

Otvoren Dom društvenih aktivnosti u Pribavi

Zahvaljujući prijateljima iz italijanskog grada Padove, na čelu sa velikim prijateljem Bosne i Hercegovine prof. dr. Fabriciom



Nakon prvog potpaljivanja kotla - općinski načelnik Nusret Helić (desno) i gl. inženjer, predstavnik uastr. firme Segess Enes Hamidović



Nakon prvog potpaljivanja kotla - općinski načelnik Nusret Helić (desno) i gl. koordinator Projekta dr. sc. Omer Hamzić (lijevo)

de Rossom, predsjednikom Humanitarne organizacije „Spalle Large“, u protekle dvije godine, Pribavljani su potpuno obnovili dom, dozidali još jedan sprat, tako da sada u tom objektu ima dovoljno prostora i za mlade i za stare. Riječ je objektu koji je u ratu bio potpuno devastiran.

15. 11. 2008.

Poljoprivrednici na gračaničkoj općini ostvarili 1.487.525 KM od podsticaja: na prvom mjestu proizvodnja mlijeka i sadnja voća

Zahvaljujući opredjeljenju Vlade Tuzlanskog kantona da poveća sredstava u Budžetu za premiranje primarne poljoprivredne proizvodnje, ove godine će na općinu Gračanica po tom osnovu biti uloženo oko 430 hiljada KM. U strukturi ostvarenih podsticaja (u periodu januar-oktobar ove godine podnesena su 532 zahtjeva), na prvom mjestu je proizvodnja kukuruza sa 84 hiljade KM, slijedi tov junadi i uzgoj muznih grla sa po 70 hiljada KM, slijede

tov pilića sa 69 hiljada, rasplodne ovce sa 67 hiljada, rasplodne junice sa 41 hiljadom KM itd.

Po ostvarenim podsticajima od Kantonalne vlade, općina Gračanica zauzima drugo mjesto na Tuzlanskom kantonu, odmah iza Gradačca.

Ovome treba dodati i podsticaje koji su ostvareni preko Udruženja poljoprivrednika, poljoprivrednih inženjera i tehničara, u ukupnom iznosu od 597.125 KM, od čega je 300

hiljada dato za sadnju novih voćnjaka, te sredstva realizovana preko ZZ „Gračanka“ u iznosu od 460 400 KM, od čega najviše otpada na otkup mlijeka—324 279 KM, što daje iznos od ukupno 1 487 525 KM koji se ove godine plasira u poljoprivredu općine..

25. 11. 2008.

Povodom Dana državnosti BiH otkrivena spomen-bista Josipu Brozu Titu u centralnom parku u Gračanici

U Centralnom parku u Gračanici, pored spomen-kosturnice borcima NOB-a,



Otkrivanje spomen-biste J.B. Titu u Gračanici- general Ekrem Durić (lijevo) i nar. poslanik Damir Mašić, poslanik

uz skromnu svečanost, otkrivena je bista Josipa Broza Tita. Bistu je postavilo Udruženje antifašista i boraca NOR-a Gračanica, zajedno sa udruženjem „Josip Broz Tito“ Gračanica. Manifestaciji su prisustvovali brojni građani, poštovaoci imena i djela Josipa Broza, te mnogi zvaničnici i gosti, među kojima: općinski vijećnici i članovi Skupštine TK i Parlamenta FBiH, općinski načelnik Nusret Helić, penzionisani Titov general Ekrem Durić, unuka Josipa broza Tita Svetlana Broz, književnik Zlatko Dukić, te predstavništva brojnih udruženja „Josip Broz Tito“ sa područja Tuzlanskog kantona i Bosne i Hercegovine.

28. 11. 2008.

Konstituisano novo Općinsko vijeće Gračanica, Predsjedavajući Muharem Musić (LDS), SDP obezbijedio većinu u Vijeću

Pregovori stranaka o formiranju većine u Općinskom vijeću Gračanica završeni su dan prije zakazane konstituirajuće sjednice Vijeća potpisivanjem Protokola o parlamentarnoj većini, koju čine: SDP (12 vijećnika), BPS (2 vijećnika), LDS (1 vijećnik) i Naša stranka (1 vijećnik). U opoziciji su ostali SDA sa 10 vijećnika i Stranka za BiH sa 3 vijećnika, dok se drugi član koalicije LDS-SDU za sada nije priklonio ni jednoj strani. U proceduri izbora predsjedavajućeg vijeća i njegovog zamjenika, SDP je za kandidata predložio Muharema Musića (LDS), dosadašnjeg potpred-



Novoizabrani predsjedavajući Općinskog vijeća Muharem Musić (drugi zdesna)

sjednika, a SDA Hasana Fehratovića, dosadašnjeg predsjednika Općinskog vijeća. Prije toga usvojena je odluka da se izbor oba zvaničnika izvrši javnim glasanjem. Prilikom glasanja, kandidat SDP-a Muharem Musić dobio je potrebnih 16 glasova, protiv je bilo 13 vijećnika, 10 iz SDA i 3 iz Stranke za BiH, a uzdržan je bio vijećnik iz SDU. Sumnju u rezultate glasanja izrazio je predsjednik Kluba vijećnika SDA Rahim Gadžić, ali je na pojedinačnom izjašnjavanju rezultat bio isti, pa je Muharem Musić, konačno izabran za novog predsjedavajućeg Općinskog vijeća Gračanica. Slična procedura, ali bez ponovljenog pojedinačnog glasanja ponovila se i kod izbora potpredsjednika Općinskog vijeća. Izabran je kandidat SDP-a Sead Gazibegović sa 16 glasova. Protivkandidat mu je bio Mirnes Ahmić iz SDA.

Novoizabranim vijećnicima, osim šefova stranačkih klubova, obratio se i Općinski načelnik Nusret Helić, koji je sasvim otvoreno iznio svoja očekivanja od novog Općinskog vijeća, a prije svega veću odgo-

vornost, prema građanima i jedinstvo na projektu, kako ga je on nazvao „Bolja Gračanica“, misleći pri tome na cijelu općinu.

2. 12. 2008. GODINE

„Širbegović grupa“ – početak poslovanja na libijskom tržištu

Širbegović grupa je ugovorila poslove u Libiji u vrijednosti od 70 miliona eura. Formirana je *joint venture* kompanija „Širbegović Libya“, sa 60% kapitala u vlasništvu Širbegović grupe i 40% u vlasništvu libijske državne kompanije MIDCO. Prvi potpisani ugovor odnosi se na izgradnju 10 sportskih dvorana u nekoliko libijskih gradova. Planirano je da u naredne dvije godine Širbegović Libya izgradi deset manjih sportskih dvorana, četiri dvorane većeg kapaciteta, stadion i turističko naselje, te da na pomenutim projektima uposli oko 1000 radnika. Ideja o nastupu Širbegović grupe na libijskom tržištu rodila se u aprilu 2008. godine, na inicijativu dr. Harisa Silajdžića. Tadašnja posjeta bh delegacije Libiji rezultirala je prvim razgovorima o konkretnim projektima, čija je realizacija sada već u punom jeku. (*Pres Širbegović grupa*)

11. 12. 2008.

Druga sjednica Općinskog vijeća: Rasprava o nacrtu Budžeta za 2009. godinu

Svoju ozbiljnost novi vijećnici su pokazali, u namjeri da Budžet općine kao najvažniji operativni dokument usvoje do kraja kalendarske godine, kako bi ostavili dovoljno vremena općinskom načelniku i nadležnim službama da izvrše sve potrebne pripreme za njegovu operacionalizaciju (mikro-planiranje, raspisivanje tendera, koordinacija sa mjesnim zajednicama i ostalim subjektima itd.). To je pokazala i

rasprava o Nacrtu Budžeta u kojoj su ispoljeni mnogi interesi, ali i spremnost da se kroz javnu raspravu i međusobnim usaglašavanjem, do kraja godine dođe do Budžeta za narednu.

Na ovoj sjednici izvršen je izbor novih radnih tijela Općinskog vijeća i usvojena Informacija o stanju neeksploziviranih ubojnih sredstava na području općine u 2008. godini

24. 12. 2008.

Najbolji sportisti u 2008. godini Belma Šerifović (odbojka) i Nermin Kadić (nogomet), u konkurenciji klubova – ŽOK Gračanica i NK Bratstvo

Na prigodnoj manifestaciji „Izbor sportiste općine Gračanica u 2008. godini“ proglašeni su najbolji sportisti, treneri i sportski radnici u sljedećim kategorijama: najbolji sportista – Nermin Kadić (NK „Bratstvo“), najbolja sportistkinja,



Belma Šerifović, najbolja sportašica općine Gračanica u 2008. godini

Belma Šerifović (ŽOK Gračanica), najbolji senior: Hidajet Šako (NK „Mladost“ Malešići), najbolja seniorka: Edina Selimović (ŽOK Gračanica), najbolji muški klub: NK „Bratstvo“ (Gračanica), najbolji ženski klub: ŽOK Gračanica, najbolji trener: Ferid Imamović (NK „Mladost“ Malešići), najbolji sportski radnik: Mehmed Omerović (NK „Jedinstvo“ Lukavica), najbolji junior: Almir Osmanhodžić (RK „Gračanica“), najbolja juniorka: Muamera Mehinbašić (Karate klub „Gračanica“), najbolji kadet: David Čivić (Šah klub „Gračanica“), najbolja kadetkinja: Almedina Štilić (Karate klub „Lavovi“ Mirićina), najbolji sportski novinar: Fikret Konjić (Radio Gračanica), najbolji sportista invalid: Hasib Salkanović (košarka u kolicima), najbolji sportski rekreativac: Mirza Mašić (tenis)

Posebna priznanja za doprinos razvoju gračaničkog sporta dobili su: MNK „Kaskada“ (Gračanica), Kahriman Omerović (Biciklistički klub „Gračanica“), Midhat Mujačić (RK „Gračanica“) i dr. Osman Bukvić, profesor tjelesnog odgoja.

29. 12. 2008.

**Treća sjednica Općinskog vijeća:
usvojen Budžet i Program rada
Općinskog načelnika za 2008.**

Iako su ulagani brojni amandmani (samo SDA podnijela 42 amandmana), nakon duže rasprave Općinsko vijeće je usvojilo Budžet za 2009. godinu sa 22 glasa za, 1 protiv i 6 suzdržanih. Prema usvojenom Budžetu, koji iznosi 12 650 000 KM i Programu rada Općinskog načelnika, težište aktivnosti u 2009. godini bit će usmjereno na nekoliko strateš-

kih pravaca, koji su grupisani u tri područja djelovanja i to: na aktivnosti koje će biti u funkciji podrške lokalnom privrednom razvoju te planiranje, projektovanje i vođenje svih infrastrukturnih i drugih projekata na općini, zatim na funkcionisanje općinskih službi kao servisa građana i lokalnog biznisa i treći na javna preduzeća i institucije javnog sektora.

Kada je u pitanju lokalni razvoj, na vrhu liste prioriteta su vodosnabdijevanje, odnosno početak implementacije Studije vodosnabdijevanja na općini i otvaranje radova na prvim bušotinama, nastavak toplifikacije Gračanice, iznalaženje rješenja deponije i zbrinjavanja čvrstog otpada na općini, te rekonstrukcija i asfaltiranje dijela regionalnog puta od Doma zdravlja, uključujući i rješenje raskrsnice kod Doma zdravlja, do naselja Lamele.

30. 12. 2008.

**„Širbegović grupa“ – saradnja sa
„Energoinvestom“**

Širbegović grupa je sa „Energoinvestom“ potpisala ugovor za isporuku i montažu čeličnih konstrukcija na Termoelektrani „Nikola Tesla B“ u Obrenovcu, Srbija. Vrijednost ugovora iznosi oko 3,5



Kompanija Širbegović na izgradnji TE OBRENOVAC

miliona KM. Saradnja sa „Energoinvestom“ predstavljala je veliki izazov za Širbegović grupu, naročito ako se uzmu u obzir poslovni rezultati koji prate „Energoinvest“, ali i njegov značaj za razvoj cjelokupne bosanskohercegovačke privrede. *(Pres Širbegović grupa)*

5. 1. 2009.

Izašao 10. jubilarni broj Biltena Aktiva vjeroučitelja Gračanica i Doboj Istok

Skoro u potpunosti posvećen je djelovanju Aktiva od njegovog osnivanja pa do kraja 2008. godine. Udarne teme u svih deset do sada štampanih brojeva su bile su: Historijat predmeta vjeronauka, Radni status vjeroučitelja na području našeg Aktiva, Aktiv direktora osnovnih škola općina Gračanica i Doboj Istok, Savjet vjeroučitelja Muftijstva tuzlanskog, Vjeronauka kroz školstvo evropskih zemalja, Kampanja za stalno uposlenje je urodila plodom, Kriteriji za školske nazive i simbole poručuju: *Vjerski simboli u kabinet vjeronauke!*, Toledo: vodeća načela o podučavanju o religijama i vjerovanjima u državnim školama, Vjeroučitelji i Udruženje ilmiije, Izvještaj o radu Aktiva vjeroučitelja Gračanica i Doboj Istok u 2008. godini..

23. 1. 2009.

Obnovljen rad općinskog Sportskog saveza

Nakon više pokušaja i opsežnih priprema, održana je obnoviteljska Skupština Sportskog saveza Gračanica, na kojoj su usvojeni programski dokumenti i rukovodstvo Saveza. Na čelo Skupštine izabran je dugogodišnji sportski radnik Zijad Dedić, a u sastav Upravnog odbora: Amir Zejnilagić, Midhat Alić, prof. dr. Osman Bukvić, Nedim Musić, Jusuf Kadić, Ibrahim Žunić i Mujo Hasić. Nadzorni odbor

u narednom četverogodišnjem mandatu sačinjavat će Faruk Smajlović, Nusret Muslimović i Bujar Murići, a predstavnik Sportskog saveza općine Gračanica na kantonalnom nivou biće Mujo Hasić. Od ove asocijacije lokalna sportska javnost očekuje da se smjelije uhvati u koštac sa problemima sporta na lokanom nivou, da pristupi sređivanju stanja u pojedinim klubovima i uspostavi bolje i stimulativnije kriterije u finansiranju sporta na općini. Neki kažu „da ne bude malo mnogo.“

26. 1. 2009.

Spora implementacija rezultata lokalnih izbora na nivou mjesnih zajednica

U proteklih nešto više od tri mjeseca od lokalnih izbora, od 21 mjesne zajednice, nova vijeća konstituisana samo u sedam i to: Doborovci, Gornji Doborovci, Malešići, Stjepan Polje, Trnovci, Babići i Gornja Orahovica. Iako u općinu pristižu informacije da je i u ostalih 14 mjesnih zajednica, taj proces u završnoj fazi, nezajažljivi apetiti pojedinaca i političkih stranaka ukazuju da će ta „priča“ po nekim mjesnim zajednicama duže potrajati. O programima rada mjesnih zajednica, na kojima treba odmah raditi niko i ne govori, pogotovo o planiranim kapitalnim projektima koji su definisani i Budžetom općine za 2009. godinu. I u ovom slučaju, prepoznaje se „rukopis“ visoke politike na najnižem stepenu društvenog organizovanja građana.

29. 1. 2009.

Četvrta sjednica Općinskog vijeća: iako je oko lokacije Centralnog spomenobilježja poginulim borcima i šehidima bilo najviše polemike, jednoglasno je zaključak da se gradnja spomenika nastavi na već određenoj lokaciji

Od važnijih odluka, donesena je odluka da se pristupi promjeni i izradi teksta Statuta Općine Gračanica, kao i Odluka o visini naknada članovima Općinskog vijeća i članovima stalnih i povremenih tijela. Prema ovoj odluci, članovima Općinskog vijeća za vršenje funkcije vijećnika pripada naknada u mjesečnom iznosu od 300 KM i uvećava se za 50 KM predsjednicima klubova vijećnika i 100 KM zamjeniku predsjedavajućeg OV. Osim toga, vijećnicima pripada i po 100 KM za prisustvo sjednicama Općinskog vijeća. Članovima stalnih i povremenih tijela OV pripada po 30 KM za prisustvo sjednici. Usvojene naknade manje su za 20% u odnosu na naknade vijećnicima iz prethodnog saziva.

Na istoj sjednici određene su mjesečne naknade i predsjedniku Općinske izborne komisije, u visini od 400 i članovima Komisije po 300 KM, a bez veće rasprave prihvaćena je i Informacija o izgradnji nove administrativno-upravne zgrade za općinske službe, te izvještaji o radu Općinskog vijeća i Općinskog načelnika u prošloj godini.

2. 2. 2009.

Umro Ibrahim Hasanbegović, učitelj

Pripadao je prvim generacijama učitelja koje su radile na prosvjećivanju stanovništva, organizaciji analfabetskih tečajeva, mukotrpno krčeći put prosvjeti i kulturi u teškim godinama poslije Drugog svjetskog rata. Rođen je 1922. godine u Rašljevi, učiteljski kurs završio je odmah poslije rata u Tuzli, kasnije je završio redovnu učiteljsku i pedagošku školu, najduže je radio kao nastavnik matematike u Osnovnoj školi „Hasan Kikić“ u Gračanici, odakle je otišao u mirovinu. Kao mlad učitelj, od 1947. do 1950. godine bio je povjerenik

za prosvjetu Sreskog narodnog odbora u Gračanici, potom sekretar Sreskog komiteta KP itd. Šezdesetih godina zalagao se za pravedniji razvoj školske mreže na području sreza i općine Gračanica, posebno kada su u pitanju sela sa dominantno muslimanskim stanovništvom, koja su u tom pogledu znatno zaostajala za ozrenskim, to jest srpskim dijelovima sreza. Zbog toga je kao čestit i principijelan čovjek došao u sukob sa lokalnim moćnicima koji su ga primorali da se povuče i potpuno napusti politiku. Iako razočaran u partiju, koja ga je odbacila, ostao je vjeran Titovoj viziji nesvrstavanja i samoupravnog socijalizma, o čemu je kao penzioner, mnogo pisao „za svoju dušu“ (malo je od toga objavljeno), pokušavajući da nađe zajedničku crtu u nekim načelima islama (zekat npr.) i izvornim načelima samoupravnog socijalizma Titovog zrelog doba. Posljednje godine života proveo je sasvim povučeno, potpuno predan vjeri i svom shvatanju života.

14. 2. 2009.

Održana Skupština Aktiva vjeroučitelja Gračanica i Doboj Istok: aktuelno stanje mektebske nastave na području Medžlisa

Od ukupno 22 člana Aktiva, koji predaju vjeronauku u 13 osnovnih škola, Skupštini je prisustvovalo 17. Za razliku od dosadašnjih skupova ovog aktiva, koji su održavani u prostorijama Medžlisa, ovaj je održan u kabinetu vjeronauke O.Š. „Hasan Kikić“ u Gračanici. Skupštini je prisustvovao i glavni imam Medžlisa IZ Gračanica, profesor Smajo ef. Mustafić. U okviru prve tačke dnevnog reda tražio se odgovor na pitanje kako poboljšati kvalitet mektebske nastave na području Medžlisa. U tom smislu, nakon rasprave,

zaključeno je da se češće održavaju radni sastanci svih imama i vjeroučitelja, da se školska vjeronauka usmjerava na teoretski, a mektebska na praktični dio, te da se po tom principu organizuju i učenička takmičenja iz vjeronauke.

26. 2. 2009.

Peta sjednica Općinskog vijeća

Gračanica: na dnevnom redu

dominirale informacije i poskupljenje usluga odvoza smeća

Nakon žive i polemične rasprave, Općinsko vijeće je, napokon, dalo saglasnost na povećanje cijena usluga odvoza smeća za domaćinstva sa 5 na 8 KM i zadužilo Općinskog načelnika da u naredna tri mjeseca prati realizaciju odluke te da izvijesti Općinsko vijeće o efektima poskupljenja. U isto vrijeme, JPK „Komus“ će u naredna tri mjeseca započeti izradu programa za unapređenje komunalnih djelatnosti iz djelokruga svoga rada.

Usvajajući Informaciju o izgradnji regionalne sanitarne deponije, od koje zbog raznih opstrukcija i otpora lokalnog stanovništva sela Huskići (općina Lukavac) vjerovatno nema ništa, Općinsko vijeće najavilo istupanje općine Gračanica iz međuopćinskog vijeća za upravljanje čvrstim otpadom. Za općinu Gračanica ovo je gorući problem, jer se ni na postojećoj deponiji, pod ovakvim uslovima, za godinu ili najdalje dvije, neće više moći odlagati otpad. Stoga treba odmah tražiti odgovor na pitanje šta i kako dalje – koji neće biti ni malo lahko pronaći. Uvođenje stranih partnera u posao, jedan je od mogućih izlaza iz ovako teške situacije.

Pored ove, Vijeće je usvojilo još i sljedeće informacije: o stanju javne rasvjete na području općine Gračanica (zadužilo

općinskog načelnika da odmah započne aktivnosti na raspisivanju tendera za izbor nosioca aktivnosti oko izrade studije o javnoj rasvjeti), o stanju bezbjednosti na području Policijske stanice Gračanica u 2008. g., o radu SOS dječjeg sela u Gračanici, o stepenu realizacije projekta toplifikacije grada Gračanice i o rješavanju upravnih predmeta u službama za upravu općine Gračanica u periodu 01. 01.—31. 12. 2008. godine

4. 3. 2009.

Odluka radnika „Fortune“: jedna radna subota u mjesecu – za svoju fabriku, kao jedan od mogućih odgovora na recesiju

Tokom posjete jedne općinske delegacije, koju je predvodio Načelnik općine Gračanica Nusret Helić, s ciljem da se na licu mjesta informiše o trenutnom stanju u fabrici, kao i o problemima koji su posljedica globalne ekonomske krize u svijetu, opće stanje u fabrici, direktor Safet Pjanić je okarakterisao riječima: „Sretna okolnost za „Fortunu“ je to što ima dobre partnere, koji ovu fabriku neće ostaviti na cjedilu, bez obzira na opću recesiju u svijetu i što ima dobre radnike, koji daju podršku menadžmentu da se što bezbolnije prevaziđu teškoće na koje se objektivno ne može uticati iz ovog kolektiva.“

Da podsjetimo, platni fond ovog kolektiva od 1.200 radnika iznosi preko 500.000 i režijski troškovi blizu 200.000 KM mjesečno.

Ono što raduje, menadžment „Fortune“ je u uslovima velike borbe za tržište, uspio ugovoriti posao do septembra ove godine, a u ozbiljnim su pregovorima da se posao obezbijedi za ovu i početak naredne godine.

I na kraju – informacija koja zaista za- služuje pažnju: prije nekoliko dana svih 1.200 radnika „Fortune“ odlučilo je da radi jednu subotu u mjesecu za svoju fa- briku. Bez naknade, da se firma ojača i da bude konkurentnija na tržištu, to jest- džaba. Bez obzira što može zvučati isuviše sindikalistički – treba ipak reći: nije dža- ba. Jer, tako se jedino opstaje na tržištu koje obučarima nije bilo naklonjeno ni u neka bolja vremena.

7. 3. 2009.

Umro Muhibija Delić, pomoćnik ministra za industriju, energetiku i rudarstvo u Vladi Federacije Bosne i Hercegovine, ugledni gračanički privrednik i političar

Njegova smrt iznenadila je mnoge nje- gove drugove, prijatelje i poznanike. Oti- šao je nakon kraće i teške bolesti i prebrzo i prerano. Rođen je 1953. godine u Soku- lu (Delići), osnovnu školu i gimnaziju za- vršio u Gračanici, ekonomski fakultet u Sarajevu. Poslije završenih studija izgra- đivao se kao privrednik na složenim i od- govornim poslovima u gračaničkoj Tvor- nici obuće „Fortuna“, potom je uslijedio „Bosna azbest“, Bosansko Petrovo Selo, u čiju se vruću direktorsku fotelju u to vri- jeme sjedalo kao po kazni. Stao je na čelo gračaničke „Fortune“, 1989. – 1991., u „smutno“ vrijeme namještenih štrajkova i vještački izazvanih nemira s kojima se suo- čavao sa zadivljujućim strpljenjem i odgo- vornošću, tražeći rješenja i kad ih, objek- tivno, nije bilo. Jer, tada nismo ni slutili šta se iza brda valja...

U najtežim danima za Bosnu i Herce- govinu (rat 1992. – 1995.), kao ratni di- rektor gračaničkog „Graplasta“, bio je u grupi gračaničkih privrednih rukovodila-

ca, koji su uspjeli skloniti mašine i ljude i na bezbjednim mjestima organizovati pro- izvodnju u funkciji odbrane.

I u političkom životu općine, kako pri- je rata (u komitetskim vremenima), tako i poslije rata, na visokim političkim funk- cijama, kao ministar finansija Tuzlanskog kantona i pomoćnik federalnog ministra za industriju, energiju i rudarstvo, krasila ga je odmjerenost i sistematičnost, zadiv- ljujuća ljudska jednostavnost i lična odgo- vornost za onog do sebe, za druga, prijate- lja komšiju... Bio je lokal-patriota u boljem značenju te riječi, takoreći do zadnjeg dana...

Ukopan je 8. 3. 2009. godine, na mje- snom greblju u svojim rodnim Delićima.

9. 3. 2009.

Spreča ponovo izvan korita: Proglašeno stanje prirodne i druge nesreće. Preko 170 hektara zemljišta pod vodom, ugrožena i Industrijska zona sa firmama „Isowood“, „Roding“

Obilne kišne padavine u prethodnoj sedmici, zapuštenost korita rijeke Spreče i ispuštanje vode iz hidroakumulacije „Mo- drac“ uzroci su plavljenja stambenih, po- slovni i infrastrukturnih objekata i po- ljoprivrednog zemljišta u Sprečkom polju i na području općine Gračanica. Zbog na- glog porasta vodostaja, tri stambena objek- ta vlasnika Šerife Dedić, Kade Dedić i Mirsada Dedića u Donjoj Orahovici, dvije vikend kuće i dva poslovna objekta u Indu- strijskoj zoni Gračanica su dijelom već bili pod vodom („Roding“ i „Isovud“), što je dodatno usložnjavalo stanje na terenu.

U nedjelju (8. 3. 2009.) je voda poče- la da ugrožava i putnu komunikacija Ora- hovica -Petrovo, a u Štabu civilne zaštite procjenjuju da je preko 170 ha obradivog

zemljišta u dolini Spreče pod vodom i to samo na općini Gračanica. Situacija nije ništa bolja ni u susjednim općinama Doboj Istok i Petrovo (RS). U popodnevnim satima u ponedjeljak je održana i vanredna sjednica Štaba Civilne zaštite na kojoj se raspravljalo o mjerama zaštite od poplava. Nakon što se upoznao sa situacijom, a na prijedlog Štaba CZ Gračanica, općinski načelnik Nusret Helic donio je odluku da se na općini Gračanica proglasi: Stanje prirodne i druge nesreće

26. 3. 2009.

Šesta sjednica Općinskog vijeća:

izvještaj o izvršenju Općinskog budžeta nije dobio potrebnu većinu

Ukupno ostvareni prihodi u 2008. godini iznosili su 11.626.488 KM, što je 1,3% više od planiranih. To je, između ostalog i pokazatelj realnog planiranja Budžeta za prošlu godinu. Porezni prihodi ostvareni su u iznosu od 8.243.133 KM ili 106,9%, neporezni 2.060.866 ili 100,48% i potpore 1.322.489 ili 77,57%. Ukupni rashodi iznose 12.109.727 KM, što je za 5,1% više u odnosu na planirani budžet. U strukturi rashoda, tekući izdaci iznose 6.846.100 KM, a kapitalni 5.263.627 KM. Dakle, razlika između prihoda i izdataka ili deficit Budžeta za 2008. godinu iznosi 483.239 KM. Izmiren je iz akumuliranog suficita, viška prihoda iz ranijeg perioda.

U objašnjenjima koje je Općinski načelnik davao vijećnicima, obrazlažući pojedine stavke iz ovog dokumenta, stoji da povećani izdaci nisu rezultat povećane, odnosno neracionalne potrošnje, nego prije svega, povećanih aktivnosti unutar službi, veće realizacije kapitalnih projekata i završetka nekih projekata započetih u prethodnom periodu. Takođe je skrenuo

pažnju da do povećanja nije došlo na izdacima administracije – na platama, toplom obroku, regresu, putnim troškovima, reprezentaciji itd. „Mi smo, jednostavno puno više investirali u putnu i drugu infrastrukturu, kao i u druge projekte od interesa za građane“. Naveo je i konkretne projekte „od interesa za (te) građane“ na kojima je dolazilo do izvjesnih, gotovo zanemarljivih, prekoračenja. Uzalud. Povala se neprincipijelna rasprava, opterećena sitnim političkim interesima zastupnika tih istih građana (bilo ih je 24, od 30 u sali) i rezultat glasanja bio je sljedeći: „Sa 15 glasova ZA, 7 PROTIV i 2 SUZDRŽANA, predsjedavajući je konstatovao da Izvještaj o izvršenju Budžeta Općine Gračanica za 2008. godinu, nije usvojen.“

Sve ostale tačke dnevnog reda bile su u sjeni neusvajanja tog izvještaja, iako takav rezultat glasanja nema nikakvih posljedica za dalje funkcionisanje općinskih službi. Od značajnijih tačaka koje su vijećnici apsolvirali, vrijedi spomenuti odluke: o javnoj rasvjeti, o utvrđivanju prosječne konačne cijene kvadratnog metra korisne stambene površine, o visini naknade za pogodnost gradskog građevinskog zemljišta – rente, o prodaji nepokretnosti u vlasništvu općine, koje će se usmjeriti u izgradnju nove administrativne zgrade općine, usvojen je i plan upisa učenika u prve razrede srednjih škola za narednu školsku godinu, te nekoliko izvještaja: o radu i finansijskom poslovanju javnih ustanova Botsanski kulturni centar i Centar za socijalni rad, o realizaciji strategije ekonomskog razvoja općine u 2008. i o procijenjenoj šteti od poplava na području općine od 7. do 16. 3. 2009. godine.

2. 4. 2009.

Otvoren Centar za napredne tehnologije (Machine Tool Tehnology Center–MTTC), u Gračanici

Centar je osnovalo sedam gračaničkih uspješnih kompanija („Plamingo“, „Helioplast“, „Bema Ba“, „Idea-Co“, „Fragmat-Izolirka“, „Variplast“ i „Mirna“), uz podršku Projekta „Inovacije u biznisu“ – Norveškog ministarstva međunarodnih poslova i Američke agencije za međunarodni razvoj (USAID). Kako je rečeno na svečanom puštanju u rad ovog Tehnološkog centra, on će raditi ne samo na dizajniranju i projektovanju gotovih proizvoda i alata za svoje osnivače i druge zainteresovane firme, već i na permanentnoj edukaciji kadrova iz domena korištenja naprednih tehnologija za mnogo šire područje od Gračanice. „Osvajanje novih tehnologija kao glavni cilj ovog projekta, bit će u funkciji jačanja konkurentnosti domaćih kompanija, ali i otvaranja novih radnih mjesta i stvaranja uslova za bolji životni standard u BiH. Ovo je dokaz da naša mala i srednja preduzeća idu u korak sa zahtjevima svjetskog tržišta u oblasti prerade plastike i industriji alata i alatjika“, naglasio je Samir Ćurić, jedan od uspješnih gračaničkih poduzetnika i vlasnik fabrike „Plamingo“, govoreći na svečanom otvaranju Centra. Dobar primjer za to je i Klaster plastičara i alatničara Bosne i Hercegovine sa adresom u Gračanici, koji uz ostalo, predstavlja veliko priznanje našim privrednicima i značajnu podršku njihovim idejama i inicijativama.

„Ovaj iskorak, jeste na neki način, u duhu poduzetničke tradicije Gračanice, ali je prije svega rezultat odlučnosti gračaničkih poduzetnika da uspost Uistinu, ovo je lijep događaj sa kojeg, evo mi u ovoj,

ipak moramo reći, neveseloj stvarnosti, začinjenoj golemim ekonomskim teškoćama, šaljemo jednu pozitivnu poruku – da se ovdje u ovoj Gračanici pozitivno misli i dobro radi. Nadam se da će sve to biti u funkciji daljeg privrednog rasta i prosperiteta Gračanice i njen korak bliže ka Evropi“, poručio je načelnik Općine Gračanica Nusret Helić na otvaranju ovog centra.

29. 4. 2009. GODINE

Sedma sjednica Općinskog vijeća Gračanica: vijećnici izglasali novi Statut općine i dali saglasnost za kupovinu objekta Sportska sala „Luke“ u Gračanici

Iako je krajem prošlog mandata Općinskog vijeća propao jedan pokušaj donošenja novog Statuta Općine (i pored očiglednog pritiska OSCE), iako se javna rasprava o ovom dokumentu vodi praktično od Nove godine, postupak njegovog usvajanja na ovoj sjednici vijeća nije prošao bez oštih polemika i burnih rasprava i sučeljavanja takozvane pozicije i opozicije, koje su se ipak na kraju svodile na to ko će voditi postupak imenovanja članova upravnih odbora javnih ustanova i preduzeća iz nadležnosti općine: Općinsko vijeće ili načelnik. Uzme li se u obzir da su te dileme, objektivno, posljedica nedorečenosti i komplikovanosti aktuelnih zakonskih propisa iz te oblasti, te konfiguracija političkih snaga u Vijeću, nije ni čudo što i ovoga puta baš zbog suprotstavljenih stavova oko tih pitanja umalo nije propao i ovaj pokušaj donošenja najvišeg općinskog pravnog akta. Ipak, došlo je do određenih kompromisa i međusobnih ustupaka i usaglašavanja između jedne strane koja bi dala sve ingerencije načelniku i druge, koja bi to isto dala Općinskom vijeću, tako da je

Statut, napokon jednoglasno usvoje.

Kupovina sale na Lukama, odnosno njenog većeg dijela (oko 60%), koji je u vlasništvu Kompanije „Širbegović“, govori se već duže kako na zvaničnim mjestima, tako i u političkim kuloarima i na čaršiji. Napokon su otklonjene sve dileme, pa je na Vijeću data saglasnost da se izvrši kupovina tog objekta (odnosno njegovog dijela od 60%) po cijeni od 1.058.000 KM, koju će Općina isplatiti sljedećom dinamikom: 5% u 2009., 10% u 2010., a ostatak do kraja 2014. godine. Uknjižba vlasništva na općinu izvršit će se odmah po potpisivanju ugovora i uplati prve ugovorene tranše. Ovaj aranžman neće dodatno opteretiti Budžet općine, jer će se za otplatu navedenih anuiteta (bez računanja kamata) uplaćivati ona sredstva koja su toj istoj Sali uplaćivana za takozvanih trenažni proces gračaničkih klubova (do sada cca 70 do 80 hiljada KM).

Osim ove dvije važne tačke, na ovoj sjednici vijećnici su, pored nekoliko odluka, usvojili izvještaje o radu i finansijskom poslovanju javnih zdravstvenih ustanova: Doma zdravlja, Opće bolnice „Dr. Mustafa Beganović“ i Gradske apoteke, te Dječjeg obdaništa „Naša djeca“, a dali su i saglasnost za plan prioritetnih kapitalnih ulaganja za 2009. godinu javne zdravstvene ustanove Opća bolnica „Dr. Mustafa Beganović“.

4. 5. 2009.

Faruk Širbegović u Kuala Lumpuru u Maleziji, sa HDC-om, glavnim malezijskim autoritetom u razvoju Halal Inicijativa, potpisao Memorandum o razumijevanju o saradnji na projektu "Halal Parka" u Gračanici, prvog te vrste u Bosni i Hercegovini

Potpisivanju Memoranduma, koje je

upriličeno u okviru 4. Svjetskog Halal foruma, prisustvovao je i Reis ul-u-lemma Mustafa ef. Cerić. Planirano je da "Halal Park" bude smješten u Gračanici, u Poslovnoj zoni Širbegović grupe. Vrijednost projekta se procjenjuje na oko 100 miliona eura i donosit će oko 500 miliona eura zarade godišnje. Za dvije godine, koliko će "Halal Parku" trebati da počne funkcionisati u punom kapacitetu, bit će otvoreno nekoliko hiljada novih radnih mjesta. – "Potencijal za proizvodnju prehrambenih proizvoda u BiH trenutno se procjenjuje na 4 milijarde eura.

Uzimajući u obzir činjenicu da muslimani čine oko 50% populacije BiH, mogućnosti za kvalitetnu halal proizvodnju su dosta velike", kazao je Faruk Širbegović, te dodao: "Malezija i BiH odavno imaju dobre odnose, te nam pričinjava zadovoljstvo da proširimo saradnju na ovaj način, pozivom našim malezijskim kolegama da iskoriste izvanredne ekonomske mogućnosti koje ima BiH.

Za njih su mogućnosti tim veće što će moći iskoristiti bosanski "Halal Park" kao platformu za izlazak na tržište EU, jer BiH ima trenutno potpisan Sporazum o slobodnoj trgovini sa zemljama EU, gdje se svi proizvodi iz BiH koji se izvoze u EU oslobađaju taksi." Potpisivanjem Memoranduma dvije strane su se obavezale na primjenjivanje samo jednog, zajedničkog Halal standarda pod OIC-om (Organizacija Islamskih Zemalja), na dodatne treninge i razvijanje neophodnih vještina, te nastavak bilateralnog trgovinskog razvoja između malezijskih kompanija i kompanija u okviru inicijative bosanskog "Halal Parka". (Pres Širbegović grupa)